## 0.0.1 Dona(loka)suttam

- 1. ekam samayam bhagavā antarā ca ukkaṭṭham antarā ca setavyam addhānamaggapaṭipanno hoti. donopi sudam brāhmano antarā ca ukkaṭṭham antarā ca setavyam addhānamaggapaṭipanno hoti. addasā kho dono brāhmano bhagavato pādesu cakkāni sahassārāni sanemikāni sanābhikāni sabbākāraparipūrāni. disvānassa etadahosi: ``acchariyam vata bho. abbhutam vata bho na vatimāni manussabhūtassa pādāni bhavissanti" ti.
- 2. atha kho bhagavā maggā okkamma aññatarasmim rukkhamūle nisīdi, pallaṅkam ābhujitvā ujum kāyam panidhāya parimukham satim upaṭṭhapetvā.
- 3. atha kho doņo brāhmaņo bhagavato pādāni anugacchanto addasa bhagavantam aññatarasmim rukkhamūle nisinnam pāsādikam pasādanīyam santindriyam santamānasam uttamadamathasamathamanuppattam dantam guttam samyatindriyam nāgam. disvā yena bhagavā tenupasankami. upasankamitvā bhagavantam etadavoca:
- **4.** devo no bhavam bhavissatīti? na kho aham brāhmaṇa devo bhavissāmīti. gandhabbo no bhavam bhavissatīti? na kho aham brāhmaṇa gandhabbo bhavissāmīti. yakkho no bhavam bhavissatīti? na kho aham

brāhmaņa yakkho bhavissāmīti. manusso no bhavaṃ bhavissatīti? na kho ahaṃ brāhmaṇa manusso bhavissāmīti.

- 5. devo no bhavaṃ bhavissatīti iti puṭṭho samāno ``na kho ahaṃ brāhmaṇa devo bhavissāmī" ti vadesi. gandhabbo no bhavaṃ bhavissatīti iti puṭṭho samāno ``na kho ahaṃ brāhmaṇa gandhabbo bhavissāmī" ti vadesi. yakkho no bhavaṃ bhavissatīti iti puṭṭho samāno ``na kho ahaṃ brāhmaṇa yakkho bhavissāmī" ti vadesi. manusso no bhavaṃ bhavissatīti iti puṭṭho samāno ``na kho ahaṃ brāhmaṇa manusso bhavissāmī" ti vadesi. atha ko carahi bhavaṃ bhavissatīti.
- 6. yesam kho aham brāhmaṇa āsavānam appahīṇattā devo bhaveyyam, te me āsavā pahīṇā ucchinnamūlā tālāvatthukatā anabhāvakatā āyatim anuppādadhammā. yesam kho aham brāhmaṇa āsavānam appahīṇattā gandhabbo bhaveyyam, te me āsavā pahīṇā ucchinnamūlā tālāvatthukatā anabhāvakatā āyatim anuppādadhammā. yesam kho aham brāhmaṇa āsavānam appahīṇattā yakkho bhaveyyam, te me āsavā pahīṇā ucchinnamūlā tālāvatthukatā anabhāvakatā āyatim anuppādadhammā. yesam kho aham brāhmaṇa āsavānam appahīṇattā manusso bhaveyyam, te me āsavā pahīṇā ucchinnamūlā tālāvatthukatā anabhāvakatā āyatim anuppādadhammā.

bjt page 078

7. seyyathāpi brāhmaṇa uppalaṃ vā padumaṃ vā puṇdarīkaṃ vā udake jātaṃ udake saṃvaḍḍhaṃ udakaṃ accuggamma ṭhāti anupalittaṃ udakena. evameva kho ahaṃ brāhmaṇa loke jāto loke saṃvaḍḍho lokaṃ abhibhuyya viharāmi anupalitto lokena. buddhoti maṃ brāhmaṇa dhārehīti.

``yena devūpapatyassa gandhabbo vā vihaṅgamo, yakkhattaṃ yena gaccheyyaṃ manussattañca abbaje<sup>1</sup>, te mayhaṃ āsavā khīṇā viddhastā vinalīkatā.

puṇḍarīkaṃ yathā vaggu<sup>2</sup> toyena nūpalippati, nūpalittomhi<sup>3</sup> lokena tasmā buddhosmi brāhmaṇāti."

pts page 039

<sup>&</sup>lt;sup>1</sup>abbhaje (syā); aṇḍaje (sīmu)

<sup>&</sup>lt;sup>2</sup>uggaṃ (syā)

³kupalippāmi (syā, machasaṃ); nūpalimpāti (ka)